

**HINI nga ISYU**

- ★ **DETATSMENT GIN-REYD, 6 NGA M14 NAKUMPISKA HAN BHB**
- ★ **GARBUSO NGA SELEBRASYON HAN “KAGAWASAN”**
- ★ **KAHUMAN HAN ELEKSYON ANO NA?**

EDITORIAL**BAG-O NGA KUSOG HAN GERILYA NGA PAKIG-GERRA**

An patikang nga mga madinaugon nga taktikal opensiba han BHB usa nga pangilalan han pagsulong han gerilya nga pakig-gerra dinhi ha aton rehiyon. Pananglitan, hinin naglabay nga Mayo 6, madinaugon nga ginreyd han BHB an usa nga detatsment han CAFGU didto ha bo. Giparayan, Pambujan Northern Samar. Unom nga M14 riple, 18 magasin ngan sobra 200 bala an nakumpiska han BHB. Mahihinumduman nga hadto liwat nga naglabay nga Abril, tulo nga tropa han 43rd IBPA an gin-ambus han han BHB didto ha bo. Layo, Pinabacdao, Western Samar. Nakakumpiska an hukbo hin 1 nga M203, 1 M14 ngan mga bala. Antes hini nga mga panhitabo, damo na nga mga aksyon militar an nailansar han BHB kontra ha mga lanong nga KRME dinhi ha aton rehiyon diin an mga pinakabantugan amo adton pagsirut kanda Carlos Larrazabal nga usa nga matiyupion ngan matalumpigusan nga agaron maytuna ha Northern Leyte, ngan kan Capt. Solima han 19th IBPA, nga damo na an utang nga dugo ha katawhan.

Ini nga mga kadaugan resulta na han aton hugot nga paghasog han palisiya han paglalansar hin gerilya nga pakig-gerra basar han tikhiluag ngan tikhilarum nga baseng masa.

☞ *padayon ha luyo nga paypay 2*

Nasulong an gerilya nga pakig-gerra ha bug-os nga nasud. Diri pa la maiha nagin sayod kita ha mga madinaugon nga taktikal nga opensiba nga ginlansar han BHB labi na ha

parte han Sur Katagalugan nga naghatag hin inspirasyon ha haluag nga masa han katawhan. Iginpakita han BHB an kakayahan hini ha mga aksyon militar ngan ha pagbihag hin mga opisyal ngan tawohan han kaaway ha proseso han reyd ngan ambus.

Ginpapakita hini nga mga panhitabo nga dako nga buwa an ginpapasarang nga saywar han kaaway nga nagluya na ngan nabungkag na an armado nga kusog han rebolusyonaryo nga kagiusan. Ha halipot nga pulong, an kaaway daw sugad hin nag-alsa hin dako nga bato pero dida la ngahaw ha iya mga tiil iginpusdak ini!

Waray duda nga an bag-o nga balitang nga pagsulong han gerilya nga pakig-away ha bug-os nga nasud ha kabug-osan ngan ha aton rehiyon ha partikular, nagpapakita hin pagkamayda hin bag-o nga kusog han rebolusyonaryo nga kagiusan tikang la nga mailansar an kagiusan nga pagtutul-id.

Basta magpursigi la kita ha paghasog han tama nga linya, programa ngan mga palisiya han Partido, diri maiha nga panahon, masingadto pa ha pagtikaagsob, pagtikahaluag ngan pagtikakusog han gerilya nga pakig-away ha aton rehiyon kabunyog ha pabarubalitang nga pagsulong han gerra han katawhan ha bug-os nga nasud. ★

SURAT HAN MAMBARASA

Mga kasama ha LARAB,

Mabuhay kamo ngatanan!

Usa han akon una nga ginbabasa ha kada isyu han Larab amo an seksyon han “Literatura ngan Arte” hini. Permi gud mag-upay ngan napapanahon an iyo napipili nga mga luwa ngan kanta nga ginpapagawas dinhi.

Suhistiyon ko unta nga usahay magpagawas kamo dinhi hin mga susmatanon o halipot nga estorya, labi na kay kadam-an liwat han lugar dinhi ha Sinirangan Bisayas mahilig hini.

Damo nga salamat!

ka. June

Ka. June

Salamat ha imo surat.

Maupay gud man an imo suhistryon nga masaladuhan naman hin mga susmatanon o halipot nga estorya an seksyon han Literatura ngan Arte. Labot la nga makakabulig ini ha paghahatag hin baryasyon, usa ini han panmasa nga porma nga magigin epektibo nga aragianan han aton mga rebolusyonaryo nga propaganda.

Ngan komo baton han imo suhistryon, nagpagawas kita yana hin PABULA para hini nga isyu.

Sige, dinhi la anay ngan MABUHAY!

Larab Istap

MGA PANHITABO NGAN HUYOB

|

UNOM NGA M14 NAKUMPISKA HA BAG-O NGA OPENSIBA HAN BHB

Han naglabay nga Mayo 6,1998, alas siete han gab-i , gin-reyd han mga pula nga mangaraway an detatsment han CAFGU ha Brgy. Giparayan Pambujan N. Samar. Nauwat an kaaway tungod nga nagsurusundalo an mga kasama, waray buto nga nahitabo ug dayon nakontrol an kampo. Unom nga M14, 18 nga magasin ngan sobra 200 nga bala an nakumpiska han mga BHB.



Ha lain nga panhitabo, gin-ambus han BHB hi Corporal Abar nga kaapi han 14th IBPA didto ha Brgy. Dorillo Jipapad E. Samar, han naglabay nga Abril 22,1998. Diretso hiya nga namatay dara han patal nga mga igo han bala. Ginsirutan hiya hin kamatayon tungod han dagko niya nga mga sala ha rebolusyonaryo nga kagiusan. Usa hiya nga intel ngan pinuno han liquidation team han kaaway. Numumuno ini hi Abar ha sobra 30 nga goons ni Montallona nga usa nga despotiko nga agaron maytuna. Labot pa, myembro liwat ini han mga tulisan ngan parupangastigo ngan parupanarhug han mga tawo. Damo an nalipay nga mga parag-uma han kamatay ni Abar, tungod han kawara han ira ginkakahadlokan.

MGA PARAG-UMA NAKIG-DAYALOG

Madinaugon an ginlansar nga dayalog han harani 200 nga parag-uma ha usa nga brgy. han Mapanas N. Samar hinin naglabay nga Mayo. Ha pangunguna han mga organisasyon masa ha baryo, ginlansar nira an demokratiko nga kunsultasyon ngada ha mga nadadabihan nga mga parag-suhol ngan mga negosyante ha baryo. An mga isyu, amo an pagpahitaas han mamlunay ha pag-agsa han lubi pabor ha nag-aagsa. Nakab-ot nira an mamlunay nga 60-40 pabor ha nag-aagsa kompara ha naglabay nga ikatulo la an nag-aagsa ngan nakikitunga pa ha pangkabugosan nga gastos. Nagdemanda liwat hira hin pagpaminos han sobra kamahal nga presyo han epektos ha mga tindahan ha baryo. Ini ngatanan nga tinguha madinaugon nga nakab-ot han mga lumulopyo han baryo.

PAGPAPAHARA HA BURUHATON INSTRUKSYON, MADINAUGON

Madinaugon nga nailansar an treyning han buruhaton instruksyon ha bataan nga balitang han naglabay nga Abril 14-20.

Gin-tambungan ini han duha nga prente han Samar, 7 an tikang ha NE, 13 ha NF2. “Dako an nahibulig hini nga treyning ha pag-isa han akon kumpyansa ha buruhaton instruksyon”, an komentaryo han harus ngatanan nga nagtambong han treyning. Dayon nakag-praktikum an NF2 hin duha nga baryo ha BOP nga balitang nga gintambungan hin 17 nga kaapi han BOP.

(*padayon ha paypay 4*)

MAYO 1 RALI, DEMONSTRASYON

Nagrali an sobra 200 nga mga trabahador ha Isabel, Leyte hadton Mayo 1 komo pagsalin-urog han International Labor Day. Ira militante nga ginpana-wagan an pagpahitaas han suhol han mga trabahador, samtang ginkondena an mga kontra-trahador ngan kontra-katawhan nga mga palisiya han gubyrno sugad han liberalisasyon ngan palisiya han pagbubungkag han mga unyon. An mga trabahador napapailarum ha militante nga NAFLU-KMU.

Samtang, ha syudad han Tacloban, ginsalin-urog an Adlaw han Pagtrabaho pinaagi hin rali han sobra 300 nga mga kabras nga tagasyudad nga ginpa-ngunahan han Forum for Urban Poor Concerns (FUPC). Ira militante nga iginprotesta an pagpasibaya han gubyrno ha mga kabras nga tagasyudad nga kadam-an liwat mga trabahador.

KRME GINSIRUTAN

Usa nga lanong nga agaron maytuna nga taga San Isidro N. Samar nga nag-ngangaran kan Layan in ginsirutan han BHB hin kamatayon han naglabay nga Mayo 25, 1998. Ginsirutan hiya hin kamatayon tungod kay hiya an utok han pagmasker han usa nga pamilya ngan pagreyp hin usa nga batan-on nga babaye. Usa pa liwat an ginsirutan hi Luciano Ladisma 45 anyos tanod ha Brgy. Balagon Can-avid E. Samar. An mga sala: lider han Legriya Gang, pagtagbo han M1-garand nga kanan kasama, paglapi hin karabaw, pagpatay ug iba pa. Nahitabo ini han naglabay nga Marso 18,1998. Samtang usa naman nga parauma, hi Yulo Rebato, taga Brgy. Libertad Maslog E. Samar, usa liwat nga ginsirutan hadton Marso 21,1998 ha sala nga: pagreyd hin grupo hin para-uma, 3 an namatay, upod-upod ha mga sundalo ha paggama han mga kasama.

**PRESYO HAN LANA ngan PAPLITON
UTRO NGA NAG-UMENTO**

Tigda nga nag-umento an presyo han lana ngan mga papliton kahuman la han

piniliay hadin Mayo. An presyo han lana inumento hin 42 sentimos kada litro. Ika-walo na ini nga hugna nga pag-umento han presyo han lana tikang maderegularisa an industriya han lana ha Pilipinas hadin naglabay nga tuig. Samtang, an mga presyo han mga nangunguna nga papliton nag-umento liwat.

**DIKTADOR HA INDONESIA
GINPATALSIK HAN KATAWHAN**

Ginpatalsik han gahum han nagkakaurusa nga katawhan ha Indonesia an diktador nga Suharto, nga naghadi han nasud hin 32 katuig na. Duso han nagtitika-grabe nga krisis pan-ekonomiya, labot pa han hilaba na nga panahon han panalumpigos han rehimen nga Suharto, yinukot-yukot nga katawhan ha Indonesia in padayon nga naglansar hin mga gios-protesta ngan demonstrasyon tikang han Pebrero. Napiritan na nga lumusad ha pwesto hi Suharto pag-abot han Mayo 21.

Samtang, nagpapadayon ngan nagtitika-kusog an pag-ato ngan gios protesta han katawhan ha Indonesia tungod kay an sinaliwan nga presidente, hi Pres. Habibie, waray pagkakaiba han iya sinundan ngan nagpapabilin nga niyu-tiyu han mga militar, naghahadi nga klase, ngan imperyalismo.



PANAN-AW

GARBUSO PERO LUNGAG NGA SELEBRASYON

*B*inilyon ka pesos an gingasto han US-Ramos nga rehimen agud himuon an garbuso

nga selebrasyon han sintenyal o ika-100 tuig nga anibersaryo han “kagawasan” han

Pilipinas tikang ha kolonyalista nga Espanyol hadton Hunyo 12, 1898.

Pero luyo han kagarbuso han selebrasyon, waray ini naihahatag nga kaupayan ha katawhan Pilipino ha damo la nga mga rason.


Syahan, pirit nga gintatahuban, ginlulubong ngan gintutuis an kasaysayan agud magserbe ha interes han lokal nga naghahadi nga klase ngan han imperyalista nga US. Ha sugad hini nga kamutangan, ginugupong nira an katawhan Pilipino ha tinuod nga mga panhitabo han aton kasaysayan agud diri masingadto ha pag-ato ngan pagrebolusyon.

Pananglitan, sobra-sobra an paghahatag nira hin dungog kan Emilio Aguinaldo komo bayani nga "nagtalwas" han Pilipinas tikang

ha kulo han mananakop nga Espanyol bisan kun ha kamatuoran usa hiya nga traydor, waray kapas ngan masurenderon nga ilustrado nga lider. Pirit liwat nga gintatahuban an madarahug, madugo, matiyupion ngan matalumpiguson nga papel han imperyalismo nga US nga tubtob yana padayon nga nagdodominar ngan nagpapakuri ha aton katilingban.

Ha kamatuoran, nagmadinaugon an Rebolusyon han 1896 tungod kay naibagsak hini an kolonyalista nga Espanyol. Pero waray mahitabo an pormal nga pagsurender han mga Espanyol ha rebolusyonaryo nga kagiusan tungod han panginlabot ngan pananalakay han imperyalismo nga US.

(☞padayon ha paypay 6)



An pamunuan han rebolusyon waray mag-iha nga naagaw han mga ilustrado tikang ha mas radikal nga liderato ni Andres Bonifacio. Ha Kumbensyon han Tejeros hadton 1897, ginpatalsik hi Bonifacio han mga ilustrado nga ginpamunuan ni Aguinaldo nga nananaglawas ha interes han mga agaron maytuna ngan komersyante. Tikang hadto, nagin inutil ngan atras-abante an pamumuno han rebolusyon. Waray mag-iha nagsurender

an pamunuan ni Aguinaldo ha kolonyalista nga Espanyol hadton 1897 ngan tinugot nga magpadistyero ha Hongkong kabalyo han bayad nga pira ka-yukot ka piso.

Hadton 1898 bumuto an Gerra nga Espanyol-Amerikano. Ginsingabot ini han katawhan Pilipino pinaagi han pagpapakusog han armado nga pakigbisog. Binalik hira Aguinaldo ha bulig han mga ahente han imperyalismo nga US nga nagpupustura nga

maayuda ha pagtatalwas han Pilipinas. Pero han magdaug na an mga rebolusyonaryo, nanginlabot ngan deretso nga gin-agaw han imperyalismo nga US an kadaugan han rebolusyon Pilipino.

Waray nahimo hi Aguinaldo kundi an sumugot. Hadton Hunyo 12, 1898, ginproklamar an Syahan nga Republika han Pilipinas nga hi Aguinaldo an presidente. Pero kadungan hini, gindeklarar han masurenderon nga pamunuan ni Aguinaldo nga an Pilipinas aada ha ilarum han proteksyon han US.

Han bumuto an Gerra nga Pilipino-Amerikano nga nagtikang han 1899, gumamit an US hin maabot 126,468 tropa ngan gumamit hin magkadirudilain nga pagpapakuri ngan pandarahug agud poypuyon an rebolusyonaryo nga kagiusan. Ha tantiya han usa nga heneral nga Amerikano, maabot hin 600,000 an namatay nira nga mga Pilipino nga mangaraway ngan sibilyan. Nagmadinaugon an pananalakay han US tungod han paggamit han duha nga taktika han panguwat ngan pandarahug. Han mapirdi an rebolusyon Pilipino, gin-imposar nira an kolonyal nga paghahadi ha Pilipinas nga nadisturbo la han pagsalakay han imperyalista nga Hapon han 1942. Kahuman han Ikaduha nga Gerra Pangkalibutan, iginsurender han US an direkta nga kolonyal nga paghahadi subay ha Balaud Tydings-McDuffie ngan Konstitusyon han Pilipinas. Pero antes an paghahatag hin nominal nga independensya ha Pilipinas, ginseguro han US nga nagpapadayon an dominasyon hini ha ekonomiya, pulitika, militar, kultura ngan palisiya pan-gawas han Pilipinas - nga amo an usa han bataan nga problema ngan surok han kakurian han aton nasud tubtob ngada yana.

Ikaduha, an magasto kaupay nga pangandam ngan selebrasyon nagseserbe nga maupay nga prente ngan pasasngilanan han pangurakot han kwarta han gubyrno. Ngani kadam-an an natuo nga an dako nga parte han kwarta nga ginamit ha eleksyon ginpaawas tikang hini nga proyekto.

Ikatulo, an garbuso nga pagsalin-urog han “kagawasan” ginagamit ni Ramos para makapagpahamot han iya dungog nga masyado na nga nadum-itan han iya maraut nga rekord han paniniyupi, pandarahug, pasismo ngan militarisasyon han katilingban.

Labot pa, tuyo niya nga libangon o liawon an nagkukuri nga katawhan han mga bongga nga mga pasalida ngan hingalimot ha pagrebolusyon.

Makasusubo ngan makangangalas pagpinsaron nga samtang an nasud nagkukuri ngan an katawhan nagsasakit, nagwawaldas naman an reaksyunaryo nga gubyrno hin bilyon-bilyon nga salapi para hini nga waray kapulsanan nga engrande nga selebrasyon.

Husto na! Tama na! Gumios na ngan isulong an nasudnon demokratiko nga rebolusyon!!★

HA KAMATUORAN

KAHUMAN HAN ELEKSYON, ANO NA?

Sugad han ginlalauman, waray makukuha nga kapulsanan an katawhan Pilipino ha naglabay nga eleksyon kundi dugang la lugod nga kakurian. Kahuman gud la han eleksyon, hinitaas dayon an presyo han gasolina ngan iba pa nga produkto nga petrolyo ngan an kaupod nga epekto han paghitaas han presyo han mga bataan nga papliton ha merkado. Pero diri la ini, tungod kay malusad na ha pwesto an kampo ni Ramos yana nga Hunyo 30, nalilisang ini yana pagpinanbaligya (midnight deal) han mga korporasyon nga pampubliko ngadto ha pribado labi na gud ngada ha langyaw nga mamumuhunan. Syempre dugang pa ini nga makakapabug-at han problema han ekonomiya han nasud. Mas magrabe pa an sitwasyon kun pormal na nga makapwesto an kampo ni Estrada tungod kay seguridad nga igpapadayon la niya an programa ngan mga palisiya ni Ramos nga klaro nga napabor ha interes han langyawanon nga mamumuhunan, klase nga agaron maytuna-dagko nga kumprador burgesya, ngan burukrata kapitalista. Labot la, diri mawawara kundi magtitikagrabe pa an pangungurakot nira ha gubyrno tungod kay unob nga kinaiya ini han usa nga sistema nga dunot.



Utro na liwat nga napamatud-an an kamatuoran nga ha usa nga bagapyudal ngan bagakolonyal nga katilingban sugad han Pilipinas, waray gud pulos an eleksyon para ha

haluag nga masa han katawhan. Ginagamit la an eleksyon han mga naghahadi nga klase agud magpadayon ha poder ngan protehiran an ira mga interes. Ha luyo nga bahin, utro nga iginpapakita hini nga kamutangan nga waray iba nga dalan kundi an dalan la han nasudnon demokratiko nga rebolusyon nga may sosyalista nga perspektiba an lohikal nga opsyon han tiniyupi ngan niraugdaug nga haluag nga masa han katawhan para ha makab-ot han tinuod nga katalwasan ngan kauswagan! ★

PITYUR

MAGPALUTAW HIN YUKOT-YUKOT NGA INSTRUKTOR!

SUMMO



“Isumpay ta ha praktika, napag-adman ta nga teorya! An MLPMZ, teorya nga gamhanan, amo an maglalamrag han tama nga dalan!...” Ini an militante nga ginkanta han mga kasama dida han kahuman han pag-aram ngan pagpapahiara ha buruhaton instruksyon nga iginlansar ha N. Samar hadin Abril. Malipayon ngan hitaas an moral han mga kasama dara hini nga aktibidad ngan sahid hira nga naikag makabalik ha kada taga nga erya para ipatuhop ha mga baryo an kampanya ha edukasyon nga iginpapanawagan han Partido ha bug-os nga Sinirangan Bisayas.

Syahan ini nga treyning han instruktur nga gin-atenderan han 20 nga kasama nga nagrepresentar han iba-iba nga erya han buruhaton masa nga naglupgop han duha nga prente. Katuyuanan hini nga treyning nga

makapagpahira hin damo nga mga instruktur nga magpapatuman hin namumuno nga papel ha kolektibo nga pag-aaram ha bataan nga balitang. Gin-urusa hini an mga kasama nga nagtambong ha yawe nga papel han buruhaton edukasyon dida ha komprehensibo nga pagkokonsolida han mga yunit han Partido ha bataan nga balitang han BOP. Ha partikular, gin-treyning an mga tinambong ha mga prinsipyo han buruhaton instruksyon ngan han istandard nga pagtutdo han Bataan nga Kurso han Partido.

“Nadugngan an akon kumpanya nga magtutdo hin BKP tungod kay naklaro ha akon an mga tama nga mga prinsipyo han instruksyon, ngan labaw pa, tungod kay dugang nga napahilarum an akon pagsantop ha mga mayor nga punto han BKP!” Ini an sering han haros ngatanan nga mga kasama nga tinambong.

Komentaryo naman han iba nga kasama nga an treyning nakagpa-aghat ha ira nga dugang nga mag-inisyatiba ngan magsistematisa ha teoretikal nga pag-aram.

Samtang an iba naman duro an kalipay dida han pagtreyning han pagdrowing hin biswal. Napagkaurusahan han mga tinambong han treyning nga mas epektibo an pag-aram kun mayda ayuda-biswal. Labot la nga napapadagmit an dalagan han pag-aram, an mga biswal nakakabulig liwat ha pagsantop han mga estudyante han mga mayor nga punto han diskusyon.

Usa nga importante nga punto nga ginhirisgutan ha treyning amo an paghahaum han pagtututdo han BKP ha kongkreto nga kahintang han BOP. Importante ini agud dayon maisumpay an mga gin-aadman nga ML nga teorya ha paghisgot ngan pagsolbar han mga pinaka-mayor nga problema ngan kagupungan nga ginkakahitapo han BOP ha ira buruhaton ngan pamumuno ha baryo.

Ini an pira nga mga prinsipyo ngan leksyon nga ginbalon han mga kadre ngan kasama dida han pagbalik nira ha ira kada tagsa erya. Antes magburublag an mga kasama, nagpalaum hira nga pararayhakon an kampanya ha edukasyon ha mga BOP ha sakop han ira erya. May kumpyansa hira nga ha pagrayhak han kampanya ha edukasyon ha batakan nga balitang, mas dako nga mga kaduagan ngan pagsulong an makakab-ot han Partido ngan rebolusonaryo nga masa ha kabaryuhan.

Waray la pagduha ka-semana, nailansar na han mga kasama an pag-aram han BKP ha duha nga BOP han baryo!

Tungod kay naarmasan han mga leksyon ngan prinsipyo han treyning, an mga instruktur nga nagdumara han edukasyon maupay nga nakagpangandam. Nagresulta ini han marayhak ngan riko nga diskusyon han mga topiko nga pag-aradman ha BKP.

Ha pag-aram han Batakan nga Proletaryo nga Katindog ngan Pagtan-aw ha Rebolusyon, maupay nga naipasantop an prinsipyo han hul-os ngan bug-os nga pagserbi ha katawhan. Ha

Diyalektiko Materyalismo, nagin marayhak an diskasyon han mga batakan nga prinsipyo han DM labi na ha karukayaknon han makaklase nga tindog, pagtan-aw ngan pamaagi ngan an importansya hini ha pagpapauswag han estilo han pagtrabaho ngan pamumuno. Ha Materyalismo Istoriko, iginpaklaro an pankatilingban nga basaranan kun kay-ano nga seguridad an pagdaug han rebolusyon ngan kay-ano diri malilikayan an pagmartsa han katawahan ha bug-os nga kalibutan ngadto ha sosyalismo ngan komunismo. Ha Ekonomiya Pampulitika, ginpakita an kapitalista nga paniniyupi komo materyal nga basaranan han katadungan ngan kaseguruhan han pagdaug han sosyalista nga rebolusyon. Kasumpay hini, ginpakita tipaunano ngan kay-ano kinahanglan igdiretso an demokratiko nga rebolusyon ngadto ha sosyalista nga rebolusyon. Ha pinakaurhi nga topiko, ginpakita an kadunutan han imperyalismo ngan kun kay ano nga ginsesering nga bisperas ini han kadaugan han proletaryo nga rebolusyon ha bug-os nga kalibutan.

Damo nga mga sayop nga panhuna-huna an natuki ngan mga kagupungan nga nalamragan tungod han pagpaklaro han mga batakan nga prinsipyo han MLPMZ. Dara hini, damo nga mga mag-iha na nga praktikal nga problema han BOP nga nakagamot ha hibubo nga pagsantop han mga prinsipyo, linya ngan palisiya han Partido an nahatagan solusyon ngan naresolba ha proseso han pag-aram han BKP.

An mga kasama ha BOP nga tinambong han edukasyon in marayhak ngan hitaas an moral kahuman. Nagsuson hira han ira kalugaringon – komo usa nga kolektibo ngan komo mga indibidwal nga kaapi hini – han pira nira nga kaluyahan ngan pagkukulang. Sering nira nga usa nga resulta han pag-aram han BKP amo an kaaghat ha ira nga magpadayon nga manalinguha ha buruhaton ha teoretikal nga pag-aram ngan pan-ideolohiya nga konsolidasyon agud maisulong nira an ira mga responsibilidad ha rebolusyon.

★

LITERATURA NGAN ARTE

(Usa nga Pabula)

AN MAGTALA-AMAY NGA BUGSOK

imo nakikit-an diri tubig kundi huna-huna mo la".



Mayda magtala-amay nga bug-sok nga nag-ukoy ha kagugub-an. Usa ka adlaw, gin-agda han amay an iya anak nga magsudoy ha guba kay mamimiling hira hin tubig nga maiinum. Maiha na an kathuraw hiton nga panahon ngan makuri na bilngon an tubig kay pinanhubsan an mga burabod.

Samtang nagsusudoy hira ha guba, an anak nga bugsok nakakita hin tubig ngan dayon nagpahibaro ha iya amay: "Tatay, tatay, nakakita ako hin tubig, manginom kita!" Ginsiplatan la han amay nga bugsok an iya anak ngan nagsiring: "Diri ak ha imo matuod nga nakakita ka hin tubig. Makuri an pagbiling tubig hini nga panahon dinhi ha guba. Waray ngani ako makaagi, asya pa ba ikaw!". Nagpiling-piling la an anak nga bug-sok han waray hiya tuura han amay. Kahuman, nagsudoy hira tipaunhan.

Waray mag-iha, nakakita na liwat hin tubig an anak nga bugsok. "Tatay, tatay, mayda ko nakita nga tubig! Tara, manginom kita!". Sumiplat na liwat an iya amay ngan nagsiring: "anak, nahiuna ako ha imo matawo dinhi ha guba. Maaram ako kun may tubig o waray. Iton

Nagupong an anak ha aktitud han amay. Tungod kay diri man hiya gintutuod han amay, diri na la hiya nag-aaringasa kada pakakakita niya hin tubig. An iya bida, nagpapatunga na la hiya hin pag-inom hin tubig ngan diri na la niya gin-aagda an iya amay.

Han maiha na nira nga pagkinilakat ha guba, maluya na an amay nga bug-sok tungod han grabe nga uhaw. Pero an anak nga bugsok makasikasi la gihapon tungod kay pirmi man nakakainom hin tubig. Han maluya na ura-ura an amay, naluoy an anak ngan kinadto hiya ha iya kita nga tubig ngan gindad-an niya an iya amay agud makainom. Duro an kalipay han amay nga bugsok han makainom hin tubig ngan dako an iya pagpasalamat han iya anak. Nagkusog utro an amay nga bug-sok ngan nakauli ngahaw hira han ira unugan.

Tikang hadto nga panhitabo, nakapurot hin importante nga leksyon an amay nga bugsok: "Diri ngay-an angay minuson an anak o hin-o man nga bag-ohan dinhi ha kalibutan. Bisan kun batan-on pa hira ngan bag-ohan pa, kinahanglan kilal-on an ira kaabtik ngan kapasidad ngan tumapod ha ira kakayahan. Kinahanglan isalikway an beterano nga mentalidad!"★